



# فجر جديد

## شعر

أحمد راضى محمود اللاوندى

هذا الكتاب منشور برعاية اتحاد كتاب مصر



عنوان الكتاب : فجر جديد

اسم المؤلف : أحمد راضى اللاوندى

المراجعة اللغوية : دار الفراعنة للنشر والتوزيع

الإخراج الداخلى والغلاف : إكرام عيد

رقم الإيداع : ٢٠١٩/٧١٠٦

الترقيم الدولى : ١-٢٠-٦٦٦٨-٩٧٧-٩٧٨

محمول : ٠١٠٠٦١٤١٦٤٥

٠٢٣٩٧٦٩١٧٦ / ٠١٢٢٤٨٢٩٥٩١

رئيس مجلس الإدارة : إكرام عيد

المدير العام : أحمد عزت

المدير التنفيذى : عزة إبراهيم

جميع الحقوق محفوظة للناشر

ان الآراء الواردة فى هذا الكتاب لا تعبر بالضرورة عن رأي دار الفراعنة للنشر والتوزيع

غصب عنى

سلفينى دموعك أبكى على اللى فات  
أصل دمعى نشفه فرحى اللى مات  
قولت تبقى الشكوى ليكى مش لغيرك  
مانتى عمرك تكرهى فىنا السكات

\*\*\*\*\*

غصب عنى ان يوم شكيت لك أو شكيتك  
كان عشانك بعث عمرى واشترينك  
كنت شايف روحى بيبك أكبر كتير  
ليكى بس إخترت عضى أساس لبينك

ماتعيز نيش بالعجز يوم لو جيت ألومك  
دا انا اللي فارش جنتى مطرح لنومك  
وانا اللي فاتح صدرى ميت خط لدفاع  
وكنت بهتف ف الجموع اليوم دا يومك

\*\*\*\*\*

ومكانش قصدى إنك تشاورى ف يوم عليا  
رغم اللي كانوا بيهتفوا بشوفوا بعنيا  
وكنت صابر ع المحن ولاهنتى يوم  
علشان ماتعلى ف وقتها تاخذى بإيديا

فاتت سنين ف العد أكثر م الخطاوى  
بصرخ وادندن ف البكى إسمك غناوى  
وبرتلك آيات أحسن بيها قلبى  
واعمل طبيبك فى الوهن وابقى المداوى

\*\*\*\*\*

فاتح ضلوعى لكل من جالك زيارة  
فارش فؤادى ليك وليهم ميت عمارة  
ولامرة قولت إنك ف يوم رح تنكرينى  
مع إن عارف مكسبى أكبر خسارة

لكن بحبك غصب عنى ومش بايدى  
عايشة ف كيانى وتسبى الدم ف وريدى  
مع انى حاسس انى اينك بالتبنى  
بفرح لفرحك حتى لو مايكنش عيدى

أنا المصرى

أنا المصرى اللى بانى

الاهرامات والسد

أنا ابن النيل وأجدادى

اللى صنعوا المجد

\*\*\*\*\*

أنا اللى تاريخى متأصل

وكل الدنيا عارفانى

وقبل إيديا ماتسلم

فاتح لشعبوها أحضانى

ومين ينكر جمال بلدى  
وهيا بين شطوط نياها  
ومين جانا وشرب منه  
لابد يعود يغنيها

\*\*\*\*\*

يشوف البسمة ف عنيا  
ويقرالها تاريخ متعاد  
وطلت خوفوم الشرفة  
يشم عبير هوا الأجداد

وجاره خفرع الواقف  
بيتوضى برزاز النيل  
بيرسم بكرة للعالم  
ف لوحة لصبح شكله جميل

\*\*\*\*\*

ومصرأهى فارشة منديلها  
من الفجر لغروب الشمس  
بتحسب خطوة اولادها  
مابين اليوم وغد وأمس

وتنده منقرع يسبق

خطاوى العد فيها سنين

تفسر حلمه قدامها

بولاد فى بطنها جايين

\*\*\*\*\*

يهز دماغه ويبارك

وقالها اولادى مصرين

أنا مستنى أحفادى

قوليلى ياغالية غيرهم مين

وجينا نمد خطاويننا  
ف طريق من يومها حتى الغد  
نكمل سكة أجدادنا  
بعزم وقوة مالهاش حد

\*\*\*\*\*

وادی الصورة اللي كان  
بيرسمها أجدادی  
ومصر صبية متعايقة  
واخده ف حضنها ولادی

اطمنى

بقى هما دول اللى اشتروك  
طب واللى باعك مين  
مين اللى كاره صحبتك  
واندس وسط العاشقين

\*\*\*\*

شايف ملامحك ع الخريطة  
بتتحنى بتبصى فين  
وبتستغيثى من الوجد  
وتدندنى بصوت الانين

حواليك ولادك كلهم  
وانا منهم بصرخ معاك  
وكلهم شايلين همومك  
قبل مايشيلم عصاك  
بس انتى شاورى وكلنا  
من قلبنا هانقول أمين

\*\*\*\*\*

مين اللى ينفع لك عريس  
ويكون أمين على كل شئ  
وعمره ما يساوم عليك  
أو يوم يطيق انك فى ضيق  
وتنامى على صدره الحنون  
مطمئه لأخر الطريق

وتكونى أهله ودينته  
ويغير عليك لوم الصديق  
محنائش هنرفض أو نعارضك  
بس شاورى ما تخافيش  
دا احنا ف قلوبنا من الشجاعة  
اللى بيصنع ألف جيش  
يا اللى انتى اسمك كلنا بنردده  
ع الصبح يبقى شق ريق

\*\*\*\*\*

اطمنى يا أم الولاد السمر قومى  
وللمى بايدينا طرفك  
وخدينا تحت عبايتك الخضرة  
اللى بيها الكل عارفك

بكرة اللى جاي لك بالأمانى  
عريس هيدفع كل مهرك  
ويزيح هموم القهر واحنا  
ها نسندك ونشد ضهرك  
ونزوقوكى بفجر تطلع  
شمسه بكر لجيل جديد  
علشان ما نخلق عصر يشهد  
اننا ما فيناش عبيد  
اطمنى هنزيع غيوم كل السحاب  
و كلنا هنطيع أوامرك

ماكانش نصيب  
ومين فينا اللي كان جاني  
وخلا الحزن مالكنى  
وباعنى واشترى فيا  
وساب الفكر هالكنى

\*\*\*\*\*

ماكانش نصيب ولا مقدر  
ولا حظى إن افارقكم  
لكن عطشان وحارمنى  
ادوق مية أبارئكم

وعيشة غريب ما بين أهلى  
وكنتموا بتنكروا ذاتى  
وانا اللى عشان محبتكم  
نسيت ف الزحمة لذاتى

\*\*\*\*\*

ف سبت دياركوا والخطوة  
شايفها ع الطريق ضالة  
وتاه قلبى اللى كان شمسه  
بتغزل م النسيم ضلة

نسيتموا عشرتى وبعتم  
كرهتوا حتى ناس بيتنا  
يفيدكوا بأيه عذاب قلبى  
ونار الفرقة نسيبتنا

\*\*\*\*\*

وقولت الاله ورا الثانية  
وقايل قبل منها متين  
اصبر نفسى ع الوحدة  
وفاكر قلبى لسة متين

لقيته ف بعدكم فاتنى  
يدور عن مطارحكم  
ولف بلاد وراها بلاد  
وقاصد بالخطا ريحكم

\*\*\*\*\*

نويت والنية مفروضة  
من القلب اللى عاشقكم  
ألف دروب على قدمى  
واشوف من غيرى عشمكم

وعكر صفو أيامنا  
وشوه صورتى ف عنىكم  
وحرصكم على قلبى  
اللى عاش العمر يعانىكم

\*\*\*\*\*

طويت الحزن ف ضلوعى  
وحابس دمع أجفانى  
أخطى الخطوة والتانية  
وألأقى التالفة رجفانى

أنادی وصوتی يتحشرج

ويتلعثم ف أناتی

لا قادر أمد ف الخطوة

ولا انتوا حبستو إهاناتی

\*\*\*\*\*

أمانة یاللی بعثونی

اشتریتوا بقلبی کام مسکین

وانا اللی کنت متعثم

وفاکر ف الفؤاد ماسکین

أخرتها ايه ؟؟؟

تبيعوا وتشترو فينا

والسلعة أرخص م التراب

والدلالين وسط الميدان

بيسكروا بدم الشباب

\*\*\*\*\*

والمزة أعراض البنات

اللى اتنهش وسط الطريق

طب مين يقول أخرتها ايه

ياللى انتوا ناوين ع الخراب؟

ملايين بتهتف ف الميدان  
والكل بيزايد عليك  
ويقولوا بنحب الوطن  
ودا اللي بتشوفه بعنيك

\*\*\*\*

طب مين ياعم اللي نهب  
واللى قتل وباعنا مين؟  
وان جيت تشاور ع الفساد  
هو اللي بيقطع ايديك

\*\*\*\*#####

إحترت بين شكى وظنوني  
وقلبي ينزف م الالم  
والاه بتصرخ بين ضلوعى  
وكلكم زيى إتصدم

صدقنا أجمل كدبة ليه

ولا احنا أصلا كدابيين؟؟

وبندعى عشق الوطن

ونجرى و نحى العلم؟

.....

فى ناس كثير ماتت وناس

تستنى دورها ف الطابور

وشايلة على إيدها الكفن

علشان ماتبقى الضلمة نور

وناس ف وسط الناس بتهتف

بالعدالة والامان

وتدير وشوشها وتلتفت

تطلق رصاصها ف الصدور

ولاحد عارف مين معاك  
ومين ف ضهرك بالسلاح  
ومين بيظعن ف الضهور  
ومين بطبطب ع الجراح

\*\*\*\*

بقت المصالح والذاتية  
والمناصب كل شئ  
وكل واحد منهم  
بيقولى حى على الفلاح

عتاب

فكى حصارك عن فؤادى

واخرجيه منه بكفالة

وان طلبتى العمر كله

مش هقولك دى استحالة

\*\*\*\*\*

لملمينى حروف كتبها

جدودى بالخط العريض

وادلوقى فوقها دموعنا

تبقى عنوان الرسالة

التراب اللى اتعجن بالدم  
كان درع و حصانة  
والعظام أيام مكان  
منها البارود  
لصاروخ ودانة

\*\*\*\*\*

كل دا صنعوه ولادك  
وانتى فى احضان الغريب  
يغسلو العار اللى لطح  
اسمهم بعد الخيانة

كل دواوين العتاب م القهر

ماتكفيش عتابك

كنت عايش جوه قبرك

اللى فرشاه لى بعذابك

\*\*\*\*\*

تشتريبي نهار لخصمك؟!!

طب وبكرة تبيعى مين؟!!

ياللى بعتهى قبل منى

عشان نعيش

أجمل شبابك

هما ضحوا واحنا متنا  
واللى عاش باعك عشانه  
حتى إسمك ع التاريخ  
عنوان على غلاف من ديوانه

\*\*\*\*\*

وانتى فارشة طرحتك  
فى الصورة من تحت الغلاف  
كان بيشر ب دمنا  
ف نخب اللى عارضك  
واللى حارس صولجانه

إرهنى الدم اللى فاضل  
واللى جلط فى العروق  
واعرضى أعضاء جثتنا  
وظلعها من الشقوق

\*\*\*\*\*

يمكن يساوا فى المزاد  
تمن لراحة جيل جديد  
ولا يطلع منه فارس  
يبقى من نسل الفاروق

انا مـخـتـلف ؟

القدر حدد ملامح خطوتي برغم العناد  
ورسملى سكة من هنا لآخر البلاد  
معرفش صدفة احنا اتقابلنا على الطريق  
ولا صحيح ارواحنا كان بينهم ميعاد ؟

\*\*\*\*\*

طول عمرى طائر بين فروع كل الشجر  
تارك هموم العشق قلبى اللى أقوى م الحجر  
قلبى اللى ساكن بين ضلوعى ما حب يوم  
اليوم لقبته بيرتجف خدنى الذهول إنه افنكر

هو الكسوف من نفسى بسأل خنى ليه؟  
وانا اللى شايله ما بين ضلوعى واخاف عليه  
أيه اللى صابك يافؤادى وليه توصلنى لكدا  
شوفت الملام ف دموعى قبل اللى ف عنيه

\*\*\*\*\*

الوقت بس عرفت ليه قلبى المعاند يرتجف  
كان لازم أومن بالغرام أوحتى بوجوده اعترف  
من خوفى ضيعت السنين واهم بأن العشق زيف  
فاكرانى غير كل البشر المغرمين وانا مختلف

## علامة استفهام ؟

الدنيا ضاقت و صدر الكون مابيساعنيش  
والحزن مالى الدروب والصير مايكفيش  
شايف ممر الدروب أضيّق من الابرة  
والخلق زاحف عليها الهم بالليشويش

\*\*\*\*\*

بقرا ف وشوشهم تعجب وعلامة إستفهام  
وحاجات كثير تنقرا ماتنخكيش بكلام  
ترجمت كل الحروف وبعيدها من تانى  
خطفنى خوفى اللعين من اللى جاى قدام

أحلام تؤجل لبكرة من سنين وسنين  
واحنا اللي ندفع فاتورة الظلم ف الميادين  
لابسين عباية أمل متفصلة بالكيد  
دابت خيوطها وبلت واترقعت بالدين

\*\*\*\*\*

والحلم سافر ف عتمة ليل لفجر عقيم  
هجرانة شمسه ولسة الفكر بينا قديم  
عجزو شاخ من زمن ولسة بنقاوح  
ونعيد ف ذكرة تاريخ مولود ف بلده يتيم

أمتى الخيوط تتلضم نسيج بها توبنا ؟  
ننهض بفكر جديد والحب ف قلوبنا  
مترقعوش اللى داب ولا تلبسو توب ناس  
دا كل توب له مقاس وياريت نكون توبنا

واد بتاع

هاتى مهما تجيبى حطى ع اللى فوقى  
مش هقولك شيلى عنى ولا فوقى  
ومش هاقول انى تعبت من الجراح  
ولا هاشتكيك غربتى واطلب حقوقي

\*\*\*\*\*

ملعون ابو اللى يطاطى راسه لاي ريح  
أو يستعين بك وقت شدة ولو كسـيح  
يا ضاحكة على كل اللى حبك بالرتوش  
يامفكرين الدنيا حلوة دا مش صحيح

الدينا صورة جميلة لونها الخـداع  
واللى يآمنها ضرورى ببقى مع اللى ضاع  
إياكو من ضحككتها إوعوا تصدقوها  
كان غيركم اشطر كنت عامل واد بتاع

\*\*\*\*\*

تخدك يومين على حجرها تقول دى ناوية تدلعك  
وتحسسك طعم الأمانى بس هي بتخدعك  
هاتشوف جمال وتحس انك شئى كبير  
وف لحظة تسقط م الهدوم وتلاقى حية بتلدعك

فتح عنيك وان نمت سيب فى واحدة صاحبة  
راقب طريقك والتفت على كل ناحية  
خليك حريص من غدرها مهما تلاغيك  
إن حسنت اطمنت ليها تضيع ف ثانية

\*\*\*

خد عبرتك منى وحاسب مهما كان  
انا كنت شاب فتوة وصاحبنى الزمان  
صدقته انى خالص ملكت الكون بحاله  
وكل يوم اغتر بيها وأقول كمان

طارت بي فوق وسط السحاب ومنعماني  
وبجهل منى ان افكرته ف يوم مكاني  
حدفتني من فوق النجوم ضاع كل شئ  
والصحة ضاعت والتفتني بشكل تاني

\*\*\*\*\*

والعمر ولي والثراب بستني دوري  
تايه غريب بجنى حصاد ذنبي وغروري  
واستعطف الناس اللي كانوا اتمنوا ودي  
والدنيا نهشت جنتي قولت لها غوري

أنا زيكم

أنا زيكم واد مصر راوی

والجسم متعبی بلاوی

رغم الألم مابحسش بیه

واعمل من الدمع غناوی

\*\*\*\*\*

واکمنی شارب من نیلها

عمری ما فکرت ف غیرها

بلف وارجع زاید شوق

ومقضى عمرى ف مشاويرها

أنا اللي ديما اصحيتها  
وتببعنى مع انى شاريتها  
ولا مرة قولت خلاص مليت  
بالعكس دا انا منها وبيها

\*\*\*\*\*

تعبت من كتر كفاحى  
والهم نسانى أفراحى  
ياشاغلة فكرى ف وقت الضيق  
وتزيدى دايماف جراحى

لاتتام جفونى ولا بتهدى  
مع العذاب ختى معاهدة  
أشيل همومك يوم ورا يوم  
ولا يوم سألتينى دا أيه دا

\*\*\*\*\*

تتنكرى ليه لوجودى ؟  
ولغيرى بالخير بتجودى  
مع إن زرعك كله رويه  
وكله نابت على عودى

انا بشتكي منك ليكي  
ومش بشتت أعاديكي  
لكن بفضفض م اللي انا فيه  
مع ان بالروح هافديكي

الكلام علي ايه؟؟

بحبك وانتى ممروضة  
وعضم ف أفة معروضة  
واحبك لقمة معروضة  
ولو ما كنتى مفروضه  
على الفقرا وعلى ابن البيه  
مانيش عارف هقولك ايه

\*\*\*\*\*

وهبتك عمرى وحنينى  
وشيلتك بين رموش عينى  
وبخلص لك تعندينى  
لو انتى مذهبى ودينى  
تغورى ومش هأمن بيه  
قوليلى انتى الكلام على ايه

تبيعي ف دمي مش فارقة  
مدام هيفك لك زنقة  
أهو اكرم لك من السرقة  
ولما اشكى من الحرقه  
تقولى اسكت يا ابن الأليه  
ياريت اعرف دا بحصل ليه

شاورتى عليا ف جموعك  
وقولتى شبعت من جوعك  
وانا اللى هتفت لرجوعك  
وتسبق دمعتى دموعك  
وجرح ف قلبى مين يداويه  
قوليلى انتى الكلام على ايه

منيش هرمى عليك اللوم  
كفاية الجو كله حسوم  
ولو قام الهوى ويزوم  
يخاف اللي ضعيف ف العوم  
ولو طوق النجاة ف ايديه  
ساعتها أعرف هقولك ايه

## كذاب

انا مش بلومك ياوطن ولاهشنتكك عمرى  
ولو يطول الأجل هيطول معاه صبرى  
كنت السكن والأمان وحضن للمساكين  
دلوقت ساحة قبور طب قولى فين قبرى ؟

\*\*\*\*\*

مين اللى فارد دراع الظلم ع الميادين ؟  
ودموع ولاد البلد سجادة للظالمين  
راصف طريقه بدم الشهدا لجل يكون  
فرعون بيحكم بلد وشعاره سنة ودين

أنا أول اللى شهد بالدين وبالسنة  
وآخر اللى إختلف ف الصف واستنى  
بسمع كلام أنبيا وبشوف سلوك شياطين  
من أمتى كان الخداع بيوصل الجنة؟؟

\*\*\*\*\*

كدبك مساوى وربك بالنفوس علام  
والنية لو مش تمام يحليها حلو الكلام  
خليتتى اصدق واقول الدنيا لسة بخير  
وكتير خدعهم كلامك علشان ناقصها علام

## صبر أيوب

أيوب طمع ف الصبر أخذه وساب لنا حبة فتات  
يارب زف برحمتك كبشة من الفرح اللي فات  
تصبر الخلق اللي عايشة تنتظر ليوم وفاتهم  
ولا جاها يوم صاحبه الفرح علشانه عداهم وفاتهم  
والدنيا شايلة ف حجرها أكبر نصيب م الأمنيات  
والكل يسعى ويجتهد والصبر بيعين ع السكات  
واناسابلى ابويا حصته وميراثه من جدى اللي مات  
وطمعت فيه برضه وخذته وسييت لخواتى النفايا  
ولا حد قادر منهم ع الهم يصبر يوم معايا  
اشتلت كل الشيلة وحدى وكل يوم بتزيد حملها  
ويشتكوا م الدنيا أقاوح وابتسم وأقولهم الدنيا مالها

واستنزف الصبر مرة بالنصيحة ومرة ادعى بالهداية

وكل مرة يعز صبرى أقول لنفسى أياه الحكاية

ياهل ترى الصبر اللى خدته يكفى اصمد للنهاية؟

انا كنت ببدر كل يوم حبه وبزرعه جنب دارى

يمكن تزهو بذرة منه ولا حتى اشوف جدارى

لقيتتى صابر حتى على صبرى ومستنى الفرج

وان ضاق خناقى ألمنى واعمل من الاحلام درج

واطلع وانزل كل مايضيق النفس يزداد حصارى

وكل يوم ابدأ واعيد واهى دايرة بتحدد مسارى

لا نابنى صبرى اللى اتورث ولاقادر اكنتم يوم وأدارى

ناس وناس

فى ناس تشوف النفاق والكهن بيقى نكاء  
والطيبة ضعف وسذاجة و النخوة تبقى غباء  
ويشوفوا طولة اللسان والهبش للجدعان  
منطق عجيب عندهم وبيدعوا الأخلاق

\*\*\*\*

تسمع فلان بيقى مين ورصيده كام م المال  
مش شرط شههم وشريف او حتى زينة الرجال  
هيفيد بأيه العلام ف عقول عماها الجهل  
القردة تاخذ غزال والقبح بيقى جمال

عجبي العجاب يا بلد غيرنا موازينك  
عرة شبابك نطق والوقت بيديك  
الصيص يساوى الرطب عند الغشيم ف الكيل  
واللص فوق العروش هو اللي بيزينك

\*\*\*\*\*

نصاب وقول مرتشى ف عرفهم مشروع  
ويبقى باشا ابن أيه ف المجتمع مسموع  
الأصل قرشك معاك هنا سيد الموقف  
تعمل شريف ينهشك الفقر قبل الجوع

غير مبادنك وحاول وسط الغلان دى تعيش  
يمكن ف يوم تنستر وتشوف رغيغ العيش  
وبلاش غموس وافتكر ان انت كنت ف يوم  
علشان شريف متقى مش لاقى تلبس خيش

\*\*\*\*

أنا أصل كنت غشيم وكرامتى وجعانى  
بخاف بتاع الناس و الدنيا كويانى  
كلمة حرام لأ حلال قلقانى طول اليوم  
و ضميرى ينقح واقول ربك ماينسانى

هو صحيح منسائش بالصحة والأولاد  
وادانى علم وثقافة وشجاعة ابن زياد  
لكن ف عرف الجهول أيه يعنى تملك كام؟  
أبقى حمار ميساويش وخسارة فيا الزاد

\*\*\*\*

وعشان كدا بنصحك ان كنت شاطر غش  
اسرق وعربد وناق بس اوعى تسرق قرش  
اسرق بنوك البلد وانهب قوت الغلبان  
خللى الفقير يتزنق مايلقى حتى المش

تبقى انت أقوى الرجال وف وسطهم سيد  
تخطف غداهم وتعطف وتمثل الجيد  
اسرق جنيه واعطى قرش من وقت للتانى  
يشفوك يلموا الجيران ويقولوا هنعيد

\*\*\*\*\*

فى ناس كثير زينا ضميرها يحاسبها  
قبل حساب ربنا ولاحد حسبها  
رضية بنصيبيها القليل وحمدة رب كريم  
بس الأكادة غيلان الدنيا ماتسبها

وعشان تجاور ديابة لازم تكون م السباع  
علشان ماتشبع ولادك يخفى مليون جاع  
النخوة والانسانية والرحمة منزوعة  
وبيع مباديك وماين دا ياما غيرك باع

\*\*\*\*\*

يارب هات رحمتك وسمحنى على اللى اتقال  
انا مش ضعيف الايمان لكن همومى جبال  
شرفى وكرامتى ومبادئى بياعونى كثير  
خايف ف يوم اتزنق ابيع كمان العيال

ياما قولت أخاف الحرام ولو أموت م الجوع  
لو حتى هلبس خيش والخيش يكون مقطوع  
يسترها واحد اله بيقسم الأرزاق  
واللى يحمل يشيل انا م الحرام ممنوع

\*\*\*\*\*

خليك ف ريج اللى صابر واتحمل التلقيح  
وعيون بتغمز عليك ورزالة التلاقيح  
ومهما كانت نياب الفقر تنهش فيك  
أرحم فى يوم الحساب تلقى العذاب بصحيح

### حسب الطلب

كل الحظوظ والنصيب مقاستها ع الأنفار  
وانا اللى حظى كبير لكنه حظ حمار  
مكتوب عليا الشقى والههم طول اليوم  
وان نابنى أكلة عليق او سكنة جنب الدار

\*\*\*\*\*

نفسى فى حظ قماش مطاط لكل مقاس  
يطول ويقصر ويتخن مش زى باقى الناس  
حسب الطلب والظروف القاه يجاوبنى  
وان داق عليا الحال ينفع يكون لى مداس

أخطى بيه ع الظرف يتحمل الأشواك  
وسط النيران والألم مايهمه أى هلاك  
مش كل يوم يتقطع وأقول قدر ونصيب  
والرقعة جنب اختها وسيور من الأسلاك

## بألف وش

القرش أصالك يا صبحي لللى مش فهيم  
يعنى اللى زىك وزيك مايساويش مايم  
وان كنت صاحب مبادئ خليهاف سرك  
أحسن يقولو عليك إن البعيد دا بهيم

\*\*\*\*\*

إحنا ف زمن كل شىئ يتباع وله أسعار  
حتى الشرف والمبادئ وان كان لهم معيار  
مايغركوش المظاهر والرياء والزييف  
يكفيكو شر الجهول اللى بعقل حمار

انقلبت الموازين والكيل طفح بالزور  
والحق واقف بعيد نفسه يعدى السور  
واحنا جدار مستعار من ظلم ومغالطة  
بألف وش وقناع وكل توب له دور

\*\*\*\*\*

تسمع كلام ف المبادئ والتقوى والاحسان  
الله عليك ياجدع أهوه دا الانسان  
أما التعامل بعيد عنكم فشر إبليس  
ويكون ملاك جنبهم وتقول عليه غلبان

متقولش قال الرسول وانت متعملبوش  
وترتل القرآن والحق معرفتوش  
انا اللى بينى وبينكم يا اهل الكرم والدين  
الحلم ساعة الغضب ولاشوفش شئى مغشوش

\*\*\*\*\*

مسلم مسيحي دا يرجع لك ماليش صالح  
تصوم لنفسك تصلى طب ليه تكون جارح؟  
صالح عباد ربنا واياك وظلم الناس  
دا اللى بياذى العباد عمره مكان صالح

وان ما جاش؟؟

يلا قومي شدى حيلك وأنتوا مدوا ايديكوا شيلوا  
اللى راح ممكن يجيلك وان مجاش ممكن نجيله  
احنا نوصله ف طريقنا نخده لما لحد عندك  
المهم نزيح غمامك لما كله يثد حيله

\*\*\*\*\*

مصريا ولاد لسة حرة مهما كان فى من فساد  
واللى داق الظلم مرة مستحيل يأذى العباد  
كل واحد فينا عارف سكته لطريق نجاحه  
واللى كان م الظلم خايف النهار ده العدل ساد

فكروا ف بكرة لولادكم والنهارده مافيش محال  
رجعوا صورة بلادكم علم وحضارة وجمال  
خلوا خطوتكم اصادكم بصوا دايمًا للأمام  
ابدؤا بروح الفريق كل واحد له مجال

\*\*\*\*\*

انسوا أي خلاف ما بينكم واقتلوا قَتَن الطغاة  
واللى ناوى يكون مكانكم والشيطان غره وغواه  
عرفوه معنى البطولة وانكم ايد واحدة دايمًا  
من هنا خارجة الرجولة اكسروا بايديكم عصاه

بنت مصر

يا بنت مصر مافيش زيك  
والشمس بتغير من ضيك  
أما الثقافة دا شئ معروف  
دا غير كمان خفة دمك

\*\*\*\*\*

العفة دايماف طباعك  
ولا تشتكى من أوجاعك  
وتصونى بعلك مهما يكون  
ولا تشتري اللى ف يوم باعك

يا بنت بلدى ياخفة ونوق  
يا صابرة ع الدنيا اما تروق  
ومهما كان من قسوتها  
بتعيني جوزك لو مزنوق

\*\*\*\*\*

يعجبنى فيك كتر دلالك  
لو الزمن جار على حالك  
تبان أصالتك وقت الضيق  
وتصونى بيتك وعيالك

مين اللى زيك فى الرقة  
لوكان عشاك ملح ودقة  
راضية بقليلك مهما يكون  
لوع السطوح أو ف الشقة

احلف

مش هامشي وهارجع تائي

عشان ف الحب انائي

وان كنت صحيح تنسائي

احلف لو كنت هاتقدر

\*\*\*\*\*

دا كلام بتقوله وتنسي

دنا قلبي عشانك مرسي

من امتي ياواد رح تاسي

داغرام وحنين متقدر

احلف لو كنت هاتقدر

أنا فت الكل ياغالى  
علشانك كل أمالى  
دي الوقت تقول وانا مالى  
وسايبنى ف حيرة بفكر  
احلف لو كنت هاتقدر

\*\*\*\*\*

طب اسال قلبك عنى  
ان كان يقدر يهجرنى  
وحياتك غصبن عنى  
لو لحظة هوانا اتعكر  
احلف لو كنت هاتقدر

مش مصدق

انا مش مصدق دى قساوتك  
ياللى انتى ف القلب غلاوتك  
يا محيضة الناس ف حلاوتك  
إزاي يهون الحب ف يوم

\*\*\*\*\*

لا عمري خنتك ولا هنتى  
وُيستحيل مهما عملتى  
على عرش قلبى اتربعتى  
يصعب عليا أكون مظلوم

حرام عليك تظلمي قلبك  
وتعذبتني بنار بعدك  
انتي اللي ف الدنيا اختارتك  
وازاي يجيني ف بعدك نوم

\*\*\*\*\*

بلاش تسرع واتأني  
أصل الخصام هأيجنيني  
وان ختني على خاطر ك مني  
يبقى انكتبلي أعش محروم

مش ممكن

انا مش ممكن أنساكى  
وابيع الحب مهما يكون  
دا لسة القلب يهواكى  
ولسه بالهوى مجنون

\*\*\*\*\*

ولوخذنى الزمان منك  
وتهت ف غربتى عنك  
انا مانسيتش عشرتنا  
وحبك فى الفؤاد مسجون

تفوت أيام وراها أيام  
واصبر قلبى ع الوحدة  
وخايف م اللى جاى قدام  
يضيع بين عند ومناهدة  
واقول م العمر فاضل كام  
عشان أصبر وأستنى ؟

\*\*\*\*\*

شاورت لقلبى على غيرك  
ومش راضى بولا واحدة  
يفتنى كتير وبيجيلك  
تسدى ف وشه مليون باب

ولما يشوفنى مع غيرك  
بيقلب فرحى كله عذاب  
لا عايش بيك ولا بغيرك  
ولا قادر على الحرمان  
ياتيجى يا اما رح أجيلك  
يا إما تقولى ايه الأسباب ؟

## ملیون مخاوی

وان جاکی ملیون مخاوی  
يقفوا ف صفاك عدا لی  
هعمل مشعوذ وحاوی  
ولاحد یصمد عدالی

\*\*\*\*

أنا كان لی م الصبر نایب  
لو شلته للناس یکفی  
ولاکانلی فیک عم نایب  
بزرع وبحصد بکفی

ولا مرة فكرت أبيعك  
لحد ما انتى اللى بعنى  
وحرمتى غصنى ربيعك  
والغواية اتبعنى

\*\*\*\*\*

وان كنتى أهلى وديانتى  
أنا عمري ما اقبل إهانة  
هكفر وأعلن خيانتى  
واشوفلى غيرك ديانة

## هكذب

هاكذب واقول انى خلاص مابموتش فيك  
والقلب باعك من سنين ولاهوش شاريك  
الكذب خيبة يا حبيبة ومش ف طبعى  
بس المصيبة بأن قلبى مابين إيديك

\*\*\*\*\*

إبقى إقطعيه أو فتفتيه علشان حداك  
ملعون أبوه الحب وسنينه الهلاك  
ياما نصحته وقولت سييك م الغرام  
ماسمعش صوتى ومن ساعتها فضل معاك

خليه يآسى وعذبيه وارضى غرورك  
مابقتش تفرق بين غيابك أو حضورك  
واتلذذى بطعم العذاب اللى احنا فيه  
لوحتى كانت لوحتى منبع سرورك

\*\*\*\*\*

بس إوعى تنسى إنك جرحتى وما جرحتك  
واتحملك وقت العتاب وكثير نصحتك  
ان السعادة ف الحياة هى العطاء  
وان بغرورك يستحيل هتلاقى راحتك

اقول على الملأ

بحبك واسمك هينطق به قلبى  
ومهما أدارى عواطفى واخبى  
ما بين الخلايق هايفضحنى حبى  
ياشمسى وقمرى وفرح السنين

\*\*\*\*\*

واكيد العوازل واقول ع الملأ  
انا اللى فى قلبى هواك اتخلق  
وشعلل عزولى وخلص اتحرق  
يانسمة ربيعى ودفء وحنين

هقولها وهاكتب قسايدى ف عنيك  
واسطر حروف الشعر كله ف ايديك  
يافرحة فؤادى أما بنده عليك  
يوزع حنانه على العاشقين

\*\*\*\*\*

وكل اللى حبوا وعاشوا الغرام  
بيبقوا التلامذة ف سرد الكلام  
وهو المعلم وهو الامام  
وكل اللى بعده سقط مادتين

صدقيني

صدقيني ما فيش مجال اكذب عليك  
أنا روى فيكى وحتى قلبى ما بين إيديك

\*\*\*\*\*

وكل كلمة انا قولتها لك نبعة منى  
واسالى قلبى اللى حبك غصب عنى

\*\*\*\*\*

قلبي اللى عاش العمر خالى ما حب يوم  
ولادقش نار العشق ولا طعم الهموم

\*\*\*\*\*

من يوم مشافك وابتدى يشكىلى همه  
وانا بين عذابى وحرقتى بعطف واضمه

وبهزن الأشواق وادارى عن عيونك لو عتى  
وازرع وورود الحب تطرح من غرامك جنتى

\*\*\*\*\*

واملا كساتى بخمر عشق الكون واضمك  
واهدىكى نشرب ترفضى وتسقینى همك

\*\*\*\*\*

لساكى عاصية القلب ليه ولا انتى كارهة محبتى  
طب كنتى ليه وصلة طريقك لما يوصل سكتى؟

فجر جديد

انا مصرى وما حدش قدى

وف الكلام باخد وادى

صناعى وحليوة وحبوب

مع ان دخلى على قدى

\*\*\*\*

علمنى ابويا أحب الناس

وبلدى تبقى التاج ع الراس

ومصر قبل متندهلى

بتبقى روحى عشانها مداس

كرامتى والعزة ف كفة  
من عمرى وانا لسه ف لفة  
الحق ليا طريق مرسوم  
والفقر مايغير دفة

\*\*\*\*

انا مصرى بفخر ببلادى  
وف حبها انا غير عادى  
برمى السلام على كل الناس  
ولا أخنش ولا حتى معادى

بغير عشانها صحيح وبثور

وف الشدايد فهد جسور

بتبقى روحى على كفى

ازرعها شمعة تفج النور

\*\*\*\*

كل الحبايب سابقى

ويعشقوها اكثر منى

وانا اللى فاكر دايب دوب

عشان غرامها مجتنى

اخدة الولاد تحت جناحها  
والزفة طلعت لفرحها  
من كل ناحية ولاد جاين  
بيرسموا فجر صباحها

\*\*\*\*

الكل يهتف وينادى  
ارواحنا نفديبها بلادى  
حتى اللى شايب فى التهليل  
بيقولها خدى اولادى

ہیبقوا جسر تخطی علیہ

لحد فجر بنحلم بیه

شایف بشایرہ علینا ہالہ

من امتی وانتی بتستنیہ

\*\*\*\*\*

وکل خاین ہیفوتک

ودا اللی کان یسرق قوتک

فاکر الخداع ہنداری علیہ

وغرہ کرمک و سکوتک

لأ دا احنا فاهمين ألعيبك  
وانت اللي رح تحصد عيبك  
نخلع جدورك مهما يكون  
ولاحد مننا هيسيبك

\*\*\*\*

ياصبية قومي اليوم يومك  
السعد أصبح من كومك  
ولاحد يقدر يكرى عليك  
ولاحد ف الدنيا يلومك

نقر الفساد رح نردمها  
ومصر بكرة نعديها  
من ثورة للمجد وأحلام  
تلاتين سنة بنكديها

\*\*\*\*

م اليوم هتتحقق وتكون  
لو حتى كان حلمك مسجون  
اتمنى واطلب تلقى الخير  
اليوم قضينا على الملعون

يا ليلة العيد

ياليلة العيد أنا سهران  
لحد الصبح مايجينى  
أراقب ضحكته الحلوة  
أوضى بها رموش عيني  
والم همومى وأغسلها  
وأطوى صفحة الأحزان  
واقول بكرة اللى جاى أحلى  
وابشر بالصفى سنينى

يا ليلة العيد بقالنا سنين  
بنحسب لك ونستناك  
وأعياد السنين عدت  
لا دقت باب ولا شباك

\*\*\*\*\*

وبحلم مرة ييجى العيد  
أحس حلاوته زى زمان  
هتعمل أيه التلت ايام  
ولسه القهر بجرى وراك

ياشاييف بكرة جاى أحلا  
أدينى حسبتهـا باليوم  
تعالى نحسب الفرحة  
واعد معاك أنين وهموم

\*\*\*\*\*

تلاقى الحزن متربع  
على عرش القلوب حاكم  
بيخطف حتى لو بسمه  
ولسه الشفة جاية تقوم

## فجر جديد للشاعر أحمد راضى

### دراسة الشاعر والناقد صلاح بدران

يعد تقديم مؤلفات الغير من دواوين شعرية

أو مجموعات قصصية أو غير ذلك من صنوف الإبداع القولى المختلفة نوعا من الرؤية النقدية الشمولية ، دون التطرق لمنهج بحثى يتناول العمل طبقا للآليات المناهج البحثية المعروفة لعلوم النقد أنه مرحلة وسط بين التحقيق والنقد ، ذلك أن التقديم يعد عتبة من عتبات الولوج الى النص أو قل للكتاب المقدم له .

وقد دفع الى الشاعر / أحمد راضى اللاوندى بديوانه ليكون مقدما فى طبعته هذه بقلمى المتواضع ، وليست هذه أول نقاط التماس ، مع مؤلفات الشاعر ، حيث سبق لى أن قدمت دراسة نقدية كاملة لديوانه " رباعيات اللاوندى " فى يونيو عام ٢٠١٤م ، وكان ذلك ضمن أنشطة اتحاد الكتاب الفرعى فى شعبته الخاصة بمحافظة دمياط والدقهلية ، كان ذلك فى الفترة التى ترأس الاتحاد مكتب الاتحاد فيها ، الأديب الصديق فرج مجاهد عبد الوهاب ، وكانت هذه الورقة النقدية معنونة هكذا " أحمد راضى اللاوندى صوت البحر والنهر.

ثم يأتي هذا التقديم اضافة الى هذا التماس المشترك بين مبدعى دمياط من خلال هذا الديوان الذى عنوانه صاحبه هكذا : " فجر جديد " .. وبنظرة خاطفة لا تستدعى تأملا طويلا ، فإن عنوان الديوان يشى بموافقة تاريخية بين مضمونه العام ، والفترة التى أبدع الشاعر قصائده فيها ، فترة ما بعد ثورة يناير إلى مثل هذا الديوان بين يدي .

فالديوان يقع فى ست وعشرين قصيدة ، هذا فى النسخة التى دفع الى بها ، وجاء بعض هذه القصائد فى صورة مربعات متوالية يجمعها خيط فكري متقارب جدا حتى لتوشك أن تكون قصيدة بالمعنى الموضوعى للقصيدة ، وبعضها كان قصائد شعرية متبعة نظام السطر الشعري الذى تنتهجه القصيدة العامية من بعد ما فارق شعراء العامية النمط البيرمى فى كتابة قصائد عامية عمودية .

لقد درات القصائد كلها حول ذلك الفجر الجديد الذى عاشه الوطن ويعيشه حتى هذه اللحظة ، فى مشاهد الإنبعاث الجديد الذى صاحب الثورة ، وقومة هذا الشعب فى جسد زاخر يستهدف تطهير ساحة الوطن من كل القوى الظلامية والفاصلة التى حشدت على صدر هذا الوطن منذ التحول الردي الذى اجتاحت أرض البلاد مدنها وقراها وأفاقها البعيدة بعد حرب ٧٣ وحتى نهاية دولة الحزب الوطنى الفاسد .

ذلك التحول الذى كان سبباً رئيساً فى تحطيم التركيبة الثقافية الفريدة لهذا الشعب وتركها مسخاً بلا هوية ، كالنبات العائم تلقى به الريح فى أى اتجاه ليرسو كالزبد فى مجاهل شواطئ الحياة المختلفة .

وليت شعرى كيف صارت الأمور إلى ما صارت إليه وانحسر ذلك المد الشعبى وتجاوزته موجات أخرى من الإضطراب توشك أن تكون سحابة تحجب شمس هذا الوطن ولا أظنها تدوم .

أولا أظن الوطن يتوانى عن بعث رياح وطنية مقدسة تزيح هذه السحابة لينبعث فجره من جديد .

لقد رصد الديوان هذه المتغيرات ووقف الشاعر بحسه الشعبى على ايقاعها وسجلها فى قصائده بحيث لا تخفى على قارئ أريب .

وفى سياق ذلك كله نجد الشخصية الشعرية لأحمد راضى شاخصة مماثلة فى انشاء الحكمة الشعبية فى كثير من قصائد الديوان كواحدة من أهم مفردات المدرسة البيرومية .

حيث تصبح الحكمة الشعبية مرتكزا يصل ابداع الشاعر العامى دائما بحكمة الشعب ومنتجه الثقافى منذ ما كانت الأمثال الشعبية والتي هى حكمة الشعب فى أدق تعريفاتها النقدية مروراً بما أبدعته القرية الشعبية فى الموال والمربع والقصيدة العامية ومن قبلها الأزجال .

كذلك فى أن من أهم ما يميز هذا الديوان بكاراة الصورة الشعرية التى تبلغ حد الإبداع الذى تنطق به كثير من الصور الفنية فى شعر الفصحى والذى تتوفر له من آليات التعبير من الصورة ما لا يتوفر أحيانا للمبدع فى شعر العامية .

من ذلك مثلا قول الشاعر

من اللى فارد دراع الظلم على الميادين

ودموع وولاد البلد سجادة للظالمين

راصفة طريقه بدم الشهيد لاجل يكون

فرعون بيحكم بلد وشعاره سنه ودين

كذلك قوله

اتقلبت الموازين والكيل طفح بالزور

والحق واقف بعيد نفسه يعدى السور

واحنا جدار مستعار من ظلم ومغالطة

بألف وش وقناع وكل توب له دور

وكما قدمت أن ليس المقام مقام فقد فانى أختم هذه التقدمة بأن الشاعر أحمد راضى اللاوندى رائد من رواد الحركة

الإبداعية فى محافظة دمياط وواحد من شعراء مصر  
النباهين اللذين أسسوا الحركة إبداعية صادقة وحرصوا  
على تربية جيل يكون امتدادا لهم وشاهدا على أثرهم فى  
الحياة الثقافية ما بقى الإبداع الأدبى على خارطة الوطن .

أ. صلاح بدران

دمياط – كفر سعد

٢٠١٩/١٤/٧م

## الشاعر فى سطور؛

الاسم ؛ احمدراضى محمود اللاوندى

اسم الشهرة؛ احمد راضى

شاعر عامية وزجال

محل الميلاد ؛ مدينة عزبة البرج

محل الاقامة ؛ راس البر

العضويات ؛

عضو اتحاد كتاب مصر

رئيس رابطة الزجالين وكتاب الأغانى فرع دمياط

رئيس نادى أدب مركز شباب مدينة عزبة البرج

عضو جمعية رواد الأدبية

صدر له ؛

ديوان عناقيد اشعار بالعامية المصرية ١٩٩٦

الهيئة العامة لقصور الثقافة

ديوان النكلة والطربوش بالعامية المصرية

١٩٩٧ طبعة خاصة

ديوان من غير سلام بالعامية المصرية ٢٠٠٠ الهيئة العامة  
لقصور الثقافة

ديوان حواديت اللاوندى بالعامية المصرية ٢٠٠٢  
طبعة خاصة

ديوان شروق بالعامية المصرية ٢٠١٠ اقليم شرق  
الدلتا الثقافى

ديوان رباعيات اللاوندى بالعامية المصرية ٢٠١٤  
اقليم شرق الدلتا الثقافى

ديوان مربعات فن الواو بالعامية المصرية طبعة  
خاصة ٢٠١٦ طبعة خاصة

له تحت الطبع ؛ ديوان مناسبات بالعامية المصرية

ديوان هو وهى اشعار بالعامية المصرية

ديوان حماريات اشعار بالعامية المصرية

شارك فى العديد من المؤتمرات والندوات الادبية على  
مستوى الجمهورية

كرم فى مؤتمر الاقاليم فى محافظة كفر المشبخ ٢٠١٦ كرم  
فى مهرجان الزجل الثانى فى مدينة نصر ٢٠١٧ كرم من  
الهيئة العامه لقصور ثقافه على التراث الشعبى ٢٠١٨

## فهرس الكتاب

٣	غصب عنى
٧	أنا المصرى
١٢	اطمنى
١٦	ماكانش نصيب
١٢	أخرتها ايه
٢٦	عتاب
٣١	أنا مختلف
٣٣	علامة استفهام
٣٦	واد بتاع
٤٠	أنا زيكم
٤٤	الكلام على ايه
٤٨	كذاب
٥٠	صبر أيوب
٥٢	ناس وناس

٥٩	حسب الطلب
٦١	بألف وش
٦٤	وان مجاش
٦٦	بنت مصر
٦٩	احلف
٧١	مش مصدق
٧٣	مش ممكن
٧٦	مليون مخاوى
٧٨	هكذب
٨٠	أقول على الملاء
٨٢	صدقينى
٨٤	فجر جديد
٩١	ليلة العيد
٩٤	دراسة الشاعر والناقد صلاح بدران
٩٩	الشاعر فى سطور
١٠٠	فهرس الكتاب

جميع حقوق النشر الورقي والألكتروني محفوظة للناشر

